

მოხსენებითი ბარათი

მოგახსენებთ, რომ ქალაქ ფოთის მუნიციპალიტეტის გენდერული თანასწორობის საბჭოს 2021 წლის პირველ სხდომას მივესალმებით და ვუერთდებით დღის წესრიგით გათვალისწინებულ ქალაქ ფოთის მუნიციპალიტეტის გენდერული თანასწორობის საბჭოს 2021-2022 წლის სამოქმედო გეგმისა და სტრატეგიის დამტკიცებას. ქალთა მიმართ ოჯახში ძალადობის წინააღმდეგ მუნიციპალური პროგრამები და გენდერული ბიუჯეტი მეტად მნიშვნელოვანია. ქალთა დისკრედიტაციისგან დაცვა და მათთვის მამაკაცებთა თანაბარი უფლებებისა და შესაძლებლობების უზრუნველყოფა გარანტირებულია საქართველოს კონსტიტუციით. ამასთან, სახელმწიფო იღებს პოზიტიურ ვალდებულებას, მიმართოს განსაკუთრებულ ზომებს მამაკაცებისა და ქალების არსებითი თანასწორობის უზრუნველსაყოფად და უთანასწორობის აღმოსაფხვრელად. ადგილობრივი თვითმმართველობის ორგანოების როლი და პასუხისმგებლობა ქალთა და მამაკაცთა თანასწორობის უზრუნველსაყოფად და ქალთა მიმართ და ოჯახში ძალადობის წინააღმდეგ მიმართული პოლიტიკის გასატარებლად საკმაოდ მაღალია.

საქართველოში ოჯახში ძალადობისა და ქალთა მიმართ ძალადობის წინააღმდეგ ბრძოლა თვისებრივად ახალ ეტაპზე გადავიდა 2017 წელს „ქალთა მიმართ ძალადობისა და ოჯახში ძალადობის პრევენციისა და აღკვეთის შესახებ“ ევროპის საბჭოს კონვენციის (შემდგომ - სტამბოლის კონვენციის) რატიფიკაციის შემდეგ. კონვენცია ითვალისწინებს რეგიონულ, ადგილობრივ დონეზე ღონისძიებების განხორციელებას ამ აქტის მიზნების უკეთ რეალიზებისათვის.

კონვენციასთან საქართველოს კანონმდებლობის ჰარმონიზაციის მიზნით, ცვლილება შევიდა სხვადასხვა საკანონმდებლო აქტში. მათ შორის, საქართველოს ადგილობრივი თვითმმართველობის კოდექსში, რომელშიც განისაზღვრა, რომ მუნიციპალიტეტი უფლებამოსილია, განახორციელოს ღონისძიებები - გენდერული თანასწორობის ხელშეწყობის, ქალთა მიმართ ძალადობის ან/და ოჯახში ძალადობის მსხვერპლთა დაცვისა და დახმარების მიზნით.

„გენდერული თანასწორობის შესახებ“ საქართველოს კანონში შეტანილი ცვლილებების თანახმად, მუნიციპალიტეტის ორგანოები, საკანონმდებლო აქტებისა და მუნიციპალიტეტის საკრებულოს ნორმატიული ადმინისტრაციულ-სამართლებრივი აქტების შესაბამისად, ვალდებული არიან, შეიმუშაონ და განახორციელონ შესაბამისი ღონისძიებები, რომლებიც მიმართული იქნება ადგილებზე დისკრიმინაციის გამოვლენისა და აღმოფხვრის უზრუნველსაყოფად. მუნიციპალიტეტში გენდერული თანასწორობის პოლიტიკის დაწერვისა და მისი ჯეროვანი გატარების უზრუნველყოფის მიზნით ადგილობრივ დონეზე შეიქმნა გენდერული თანასწორობის მექანიზმები - მერიაში გენდერული თანასწორობის საკითხებზე პასუხისმგებელი პირი და საკრებულოში გენდერული თანასწორობის საბჭოს სახით. კანონით ასევე განისაზღვრა, რომ ადგილობრივი თვითმმართველი ერთეულის ბიუჯეტი, სოციალურ-ეკონომიკური

განვითარების პრიორიტეტები, მუნიციპალური პროგრამები და გეგმები იმგვარად უნდა შემუშავდეს, რომ გამოირიცხოს ნებისმიერი ფორმის დისკრიმინაცია.

ქალთა მიმართ და ოჯახში ძალადობის პრობლემის კომპლექსურობიდან გამომდინარე, მის წინააღმდეგ ბრძოლაში მრავალი სახელმწიფო სტრუქტურაა ჩაბმული. ამ ბრძოლის ეფექტიანობა პირდაპირპროპორციულადაა დამოკიდებული ძალადობის წინააღმდეგ მოქმედი ყველა უწყების მიერ დაკისრებული როლის გააზრებასა და მოვალეობათა პირნათლად შესრულებაზე. სისტემური და კოორდინებული მუშაობის უზრუნველსაყოფად, აღმასრულებელი ხელისუფლების ფარგლებში, შეიქმნა გენდერული თანასწორობის, ქალთა მიმართ ძალადობისა და ოჯახში ძალადობის საკითხებზე მომუშავე უწყებათაშორისი კომისია, რომლის უმთავრესი ამოცანაა სტამბოლის კონვენციის მოქმედების სფეროში შემავალი ძალადობის ყველა ფორმის პრევენციისა და აღკვეთისაკენ მიმართული პოლიტიკისა და განხორციელებული ზომების კოორდინაცია, განხორციელებაზე მონიტორინგი და შეფასება. უწყებათაშორისი კომისიის წევრია საქართველოს პრემიერ-მინისტრის მრჩეველი რეგიონალურ საკითხებში, რომლის ამოცანაა, უზრუნველყოს სახელმწიფო ხელისუფლების ორგანოებსა და მუნიციპალიტეტებს შორის ურთიერთობის კოორდინაცია.

ადგილობრივ დონეზე გენდერული პოლიტიკის ჯეროვნად გატარებისათვის უმნიშვნელოვანებია გენდერული პოლიტიკისა და გენდერული ბიუჯეტირების დანერგვა. გენდერული ბიუჯეტირება გულისხმობს გენდერული პერსპექტივის ინტეგრირებას საბიუჯეტო პროცესის ყველა დონეზე და შემოსავლებისა და ხარჯების გადანაწილებას გენდერული თანასწორობის ხელშეწყობისათვის.

ქალაქ ფოთის მუნიციპალიტეტის მერიის 2021 წლის ბიუჯეტში გათვალისწინებული ჯანმრთელობისა და სოციალური დაცვის სამსახურის პროგრამული მართვის მიხედვით გათვალისწინებული პროგრამები გენდერულად მგრძნობიარეა. კონკრეტულად, რამოდენიმე პროგრამა, კერძოდ, „ოჯახური ძალადობის მსხვერპლთა დაცვის ღონისძიებები“, „თავშესაფრის გარეშე დარჩენილი ოჯახების დროებითი საცხოვრებელი ბინის ქირით უზრუნველყოფის პროგრამა“ და „გენდერული თანასწორობის ხელშეწყობის პროგრამა“ პირდაპირ პასუხობს იმ მოთხოვნებს, რასაც გენდერული ბიუჯეტირება გულისხმობს.

რაც შეეხება სიახლეს, შიქმნა ახალი პროგრამა სახელშეწყობით: „საქმიანობათა ცენტრი ფოთში უსაფრთხო გარემოსა და სიცოცხლის ხელშეწყობისათვის“, რომლის მიზანია ზრუნვა მოსახლეობის დაუცველი ფენის ჯანმრთელობაზე და სოცილურ კეთილდღეობაზე, ცხოვრების ჯანსაღი წესის პროპაგანდა: კატასტროფებისა და საგანგებო სიტუაციებისათვის მზადყოფნისა და რეაგირების ეფექტური მეთოდების შემუშავება. პროგრამა განხორციელდება საქართველოს წითელი ჯვრის საზოგადოების თანადაფინანსებით და ქალაქ ფოთის მუნიციპალიტეტის 2021 წლის ბიუჯეტის მხარდაჭერით.

პატივისცემით,

ქალაქ ფოთის მუნიციპალიტეტის მერიის

ჯანმრთელობისა და სოციალური დაცვის

სამსახურის უფროსი

მაკალათია

მარა